

KIRBEPREDIGT 1994

Bald isch onser G'schäft erledigt,
fehlt jetzt bloß no d' Kirbepredigt.
Viel isch en letzter Zeit passiert,
was hend mir alles organisiert.
Sitzung uff Sitzung isch do gwä,
manchmal hasch's nemme übersäh'.
Doch mir hend g'nomma alle Klippa,
obwohl mit waret bloß 8 Typa.
Dr Jahrgang hatt zwar 22,
mitg'macht hend 8, des isch so ranzig.

Gott sei Dank hat's seither klappt,
mit hend viel g'schafft ond Geld berappt.
Au kräftig g'sammelt hend mir scho,
dür d' Marbacher Diakoniestatio.
Für die gibt's a elektrisches Bett,
des i em Alter au gern hätt.

So, jetzt werdet ihr informiert,
was des Jahr für Sacha send passiert.
Bei Politik ond Sport ond Geld,
en Benninga ond uff dr Welt.
Mir fahret net glei so weit fort
ond fanget an bei ons em Ort.

Beim Gmeinderat war wieder Wahl,
ond für dr Wähler war's a Qual.
Wen soll i von dene wähla?
Kann i uff denn dann au zähla?
Vorsprecha dean se alle viel,
des isch bei Wahla halt dr Stil.
D' Meinunga waret g'spalta,
kann sich d' Liste 4 no halta?
Wie viel brenget d' Note nei?
Isch vielleicht a Frau dobei?
Jedenfalls em Wahlprospekt
hend mir Bilder dann entdeckt.
Mit dene man sei Alter schön,
mei, was hend mit g'lacht ond klönt.

Isch s' Biddle au scho 10 Jahr alt,
dr Wolfgang Vordermaier lässt des kalt.
Der nemmt bei jeder Wahl halt s' Gleiche,
ond denkt bestimmt: oh, Alter weiche!

D' erste Sitzung fing gut an,
mir Kirbejungs als Ku-Klux-Clan.
Die Fackla ond onsre Kapuza,
die sollet mir nicht mehr banutza.
Mir seiet dena viel zu ähnlich,
des fandet mit – ganz offa – dämlich.
Mir fendet, des hat Tradition
ond hend a andere Intention.

Drom Gmeinderät dean euch konzentriera
uff Sacha die d' Leut interessiera:
d' Grundschool hend ihr schön erweitert,
auch finanziell isch's net gescheitert.
Mit viel Glas ond Sonn' em Wender,
für die Benninger Schülerkender.

Dr Schultes hat s' Idee gebora,
jetzt isch se en alle Ohra.
D' Finanzierung isch zwar schwer,
doch a Umgehungsstroß muass her.
S' Verkehrsaufkomma des steigt ständig
ond macht dr Ortskern sehr lebendig.
Die Aussichta, die send gespalta,
ko so a Stroß des denn uffhalta?

Beim Geiß, do hat's a Rohr vorrissa,
des hat dr Gehweh so verschlissa.
Mei, was hend die Bürger plärrt,
denn tagelang war d' Stroß gesperrt.
Doch semmor über ois em Klara:
a Jeder isch halt doch durchg'fahra.

Mir könnet noch so viel erzähla,
doch musstet mir no andere wähla.

Des war au die gleich Plag,
die Wahl zum Deutscha Bundestag.
S' Ergebnis war, dr dicke Kohl,
fühlt sich als Kanzler weiter wohl.
Scharping war koi Konkurrent,
d' FDP hatt beinah g'flennt.
D' CSU macht dicke Backa,
ond d' Grüne konntet's grad no packa.
Trotz Gregor Gysi ond viel Stress
hat's grad no g'langt für d' PDS.
Was viele sicher erheitert
war, dass die REPS send kläglich g'scheitert.

Doch jetzt wieder z'rück en Ort,
em Kurzbericht fahret mir fort.
Beim TSV, do schaffet alle
mit voller Kraft an ihrer Halle.
S' ganz Jahr wird do baut ond g'macht,
meistens tags, doch au bei Nacht.
Statt d' Kirbebuabe z' unterstütza,
müasst se alle Chancen nütza.
Om irgendwie an Geld zu komma,
vielleicht hend se sich übernomma?

Für Freizeitkicker des Turnier
ging en d' Hosa, glaubet's mir.
Em Hochwasser ist es ersoffa,
dr TSV war stark betroffa.
Doch mit Improvisation,
dr Bolzplatz wurd zom Stadion.

Doch en Amerika bei der WM
ging's no viel mehr um DM.
Dr Berti Vogts ond seine Manna
wolltet nach em Titel langa.
Man war jo schließlich noch amtierend,
doch ihr Gekicke war frustrierend.
Also war nach knapp 4 Jahren
Endstation gega d' Bulgara.

Für d' Benninger ond ihre Gäst
war kurz danach dann Stroßafest.
D' Vereine hend sich engagiert
ond Spezialitätä präsentiert.

Do war wieder ebbes los,
Honger ond Durscht war riesagroß.
Manche die hend so viel tankt
ond beim Hoimweg kräftig g'schwankt.

Dies Jahr gab's aber net bloß Fest',
en Indien do tobt die Pest.
Unruhen en jeder City,
bei de Neger auf Haiti.
Synthetische Droga nehmet zu,
mit Aids isch emmor no koi Ruh'.
Unklar isch no, was sie bezweckte,
mit ihr'm Selbstmord, die Schweizer Sekte.
En Jugoslawien wird weiter kriegt
bis oiner tot am Boda liegt.
Auch dr Hussein em Irak
fühlt sich plötzlich wieder stark.

Ach, was isch die Welt dorch wirre,
s' gibt halt doch e Haufa Irre.
Doch mir lasset ons net störa,
dean dr Kirbegeist beschwöra.
Ond s' Feuerwerk en Himmel lassa,
dass wacklet alle Kaffeetassa.
Bevor mir machet dann a Pause,
isch en dr Kelter no a Sause.
Denn ons 8 Buaba von dr Kirbe,
machet so Sacha net glei mürbe.

AMEN